



Dvoje je uhapšenih zbog zločina u Lozju

U Lozju čekaju pravdu

Uhapšeni se terete da su komandovali i učestvovali u napadu na selo, prilikom kojeg je ubijeno oko 30 žrtava, među kojima su žene i djeca

Državna agencija za istrage i zaštitu (SIPA) jučer je na području Višegrada i Novog Goražda lišila slobode dvije osobe. Kako su kazali iz Tužilaštva Bosne i Hercegovine, istraga se odnosi na ratni zločin nad civilnim žrtvama bošnjačke nacionalnosti u mjestu Lozje na području Goražda.

- Osumnjičeni se terete da su kao komandanti jedinica VRS-a na tom području komandovali i učestvovali u akciji napada na navedeno selo, prilikom kojeg je ubijeno oko 30 žrtava, uglavnom civila, među kojima je bilo žena, djece i osoba starije životne dobi, pojašnjavaju iz Tužilaštva BiH.

Pod istragom su osumnjičeni zbog krivičnih djela - ratni zločin protiv civilnog stanovništva, organiziranje grupe ljudi i podstrekavanje na učinjenje krivičnih djela

genocida, zločina protiv čovječnosti i ratnih zločina, u vezi sa krivičnim djelom individualna i komandna odgovornost iz Krivičnog zakona Bosne i Hercegovine.

Nakon lišenja slobode osumnjičeni će biti predati postupajućem tužiocu koji će ih ispitati i nakon toga odlučiti o daljim aktivnostima u predmetu.

Prije nekog vremena Muamer Džananović iz Instituta za istraživanje zločina protiv čovječnosti i međunarodnog prava Univerziteta u Sarajevu govorio je kako se iz plana izvođenja napada na Lozje i okolna sela jasno vidi da je potpisnik naređenja za napad načelnik štaba Jovo Mitrović, dok je napad odobrio Brane Petković, tada komandant štaba TO Srpsko Goražde i bivši komandir stanice milicije u Goraždu. Tek u januaru 2021.

Tužilaštvo BiH podiglo je optužnicu protiv Petkovića, koji trenutno živi u Srbiji.

Lozje je napadnuto 22. maja 1992. u ranim jutarnjim satima. Desetine stanovnika ubijene su u svojim kućama ili u pokušaju da pobjegnu, a jedan broj žena i djece je zarobljen. Članova porodica ubijenih iz godine u godinu je sve manje, svake godine apeliraju da se krivci kazne, ali rezultati izostaju.

- Znamo da ni nakon 29 godina niko nije osuđen ni dana za ovaj zločin, dok su naša četvorica osuđena na 50 godina zatvora, koji su navodno pobili sedam srpskih vojnika - ne civila, nego vojnika koji su zarobljeni i koji su bili učesnici u ovom zločinu, rekao je na obilježavanju godišnjice zločina Emir Čengić, kojem su u ovom napadu ubijeni otac, dva brata, daidža i ostala rodbina i komšije. **DŽ. Z.**